

Schulte, Marlies (Plöskers Marlies)

De Braukstroote in Kurten

Weu da froiher wuhnt hiärt

Da well ick mol säun bittken van schrüiven, weu da froiher säu alle wuhnt hiärt. Ett iss ja säu, unnen im Durpe, in den ollen Strooten, wuhneren de Lüe, de fast alle en Buinamen haan. Wenn euner nigge no Kurten trock, käm de mit düsen düsen Düernanner an Huisnamen ürwerhaupt nitt kloer. Datt ist ja auck für sürn Buiterdürbsken gar nitt sau lichte. Wenn de vandage mol duir de Braukstroote geust, mott me seggen, dat sick die Huiser nit säu warne verännert hätt. De ollen Huiser sind alle en bittken ümmekrempelt un auk vergröttert woern, owwer affrieten und wat ganz nigges bugget, iss nit sau oft passeuert. Man kann seggen, et iss no säun bittken old Kurten, owwer alles fuin un scheun.

Weu wuhnere denn do alle? Opp de Ecke Minnigs Drüke, Schragen Happ, Dorfitz, Kurlejans, Rillemeuers, dan dirn kleunen Schlenker ümme de Ecke Pütz, Pippings, Köböken, Halsbans, dann widder Kussmuss, Greunen Marie, Lipps und Sternekuikers.

De annere Suite runner fäng ett an mit Flamtüners, Aschenpeuters, Kukucks, Kollen, Stuilen und opp de Ecke wuhneren Sprengers.

De annere Suite runner fäng ett an mit Höttlers, Hangebüls, Kochs, Hüllengürts, Remmes, Schlurkers, Flamtüners, Aschenpeuters, Kuckuks, Kollen, Stuilen und opp de Ecke wuhneren Sprengers.

De Geschäfte

Un watt für Düsseldurp de Kö iss, wass für Kurten de Braukstroote. Jetzt denket nitt, ick wöer nitt mehr richtig im Koppe, owwer jetzt tell ick mol de ganze Geschäfte opp, de tui müiner Kinntertuit do alle gaff.

Anne Ecke bui Fahrschaule Plitt ha de Metzger Redder vanne Stadt suine Zweigstüe. De brach jeden Murgen die frischken Würste und datt Fleusch uit de Stadt und owends halere heu alles wüer aff und datt käm inne Keulunge. Am anderen Murgen geng ett wüer van vürne loss. Dann gaww ett in duisem Häuse ümmer Klamotten ti kaupen. Eus bui Mäding, dann bui Werner Werl und die letzt bui Schragen Fritzken mit Unnerbüchsen, Strümpen, witte Fleugen für dat Schützenfest und alle saun Kleunkram. Dann käm ümme de Ecke Schnüdermester Strug.

Als nächstes de Schausterbude van Rillemeuers, wo de ölste Tochter sogar de Schae besorlen konn. Hüer säten die Kürter Mannslüe gäern und diskudeuerten de Ergebnisse vam Fussball. Ürwerall hangen Plakete annen Wännen, von SuS Kurten und Schalke.

Un Rillermeuers Oma nitt täu vergierten, wehe, wehe, dui has de Porte orpen looten, dann reup so owwer ächter di hier, use Hauhner use Hauhner laupet wirg. Un wehe, dui käms nitt trügge, datt ha se bis taum nächsten Mol nitt vergierten.

Dann maket wui wüher en kleinen Schlenker taum Füerteuch. Da war Pippings Bäckerigge. Domols wassen de Familien noch grötter un jeden Dagg moch me ein Braut hahlen. Do gaww et keune teun Sorten Braut. Graubrot, Kassler und Sundags en Stuten mit Rosünen.

Un Pippings Resi wass ja de düchtigste Verkäuperin van Kurten. Datt wietet sogar no use Kinner. Wenn enner für use Omma en Stück Kauken hahlen soll und se mochte ürwerhaupt kenn Marzipan, dann hiert Resi sau lange küert und doon, datt se wirklich glofften, datt use Omma datt doch worl ierten dä.

Koböken Franz wass Huisschlächter und echten inne Ecke wuhneren Halsbanns, dat pässere gutt tisammen, de wass Trichinenbeschauer.

Dann geng ett widder inne Braukstroote mit Kussmuss un de Heutmangel, wo Beckers Motter, Lipps Lisebett, Sussen Paulu un natürlich Kussmuss Motter de Lakens mangelten. De euste Mangel stand urwen und do moch me mit dem schwoern Fass Wäske düse olle Holttreppe ropp. Datt wass ümmer saun warnen Kraftakt. Kussmuss Erich hiert mi dirn Werbespruch vertallt: „Wäsche glatt und ohne Falten – kann man bei Heißmangel Dietz erhalten.“

Widder ropp in Richtunge Bökenfeuer gaww ett no de Tankstelle und Autowirkstüe Brüggemegger. Gegenürwer wörn Höttlers Vatter und suin Suhn Embett beude Huisschlächter.

Bui Hangebuils im Huise har Kochs Anton suine Schnüderwirkstüe. Wenn de Anzüge ferrig wöern, mochen Bartholomes Hans un Fritze se inne Kundschaft brengen. Betahlen moch me buim Mester und dann verkoff heu no dirn passenden Schlipps, domit me nit extra no de Stadt feuern mochte.

Dann kämen Schlurkers mit de Schreunerigge. Schlukers Motter mochte Middags ümmer den grauten Pott Irten kurken, denn de Gesellen und Lehrlinge woern Middags buim Mester beköstigt.

Widder geng ett mit Kuckucks. Da hahn twoi Geschäfte Konialwaren un de Oppa mäk no Holksken und repareuere Schauhe. Bui Kuckus gaww et de lekkersten ingelagten Heringe. De schmeckeren besonnens gutt und de Lüe vam Schäperkampe haleren se sick Früdaggs taum irten.

Dann kam Schulten Hugo mit suinem Frisursalon. Da hiert sau manniges Mirken von Kurten ett Hoerkröllen und ett Wellen leggen lehert. - An der anneren Suite ha Kosmehl suinen eusten Laden, de vandag in Irfte iss und füler kostbares un ganz düeres Geschüer bekannt is.

An düse Tuit könnt sick nitt mehr de meusten dran erinnern. Owwer wui Kinner out düse Tuit haan kenn Fernsehen un auk kenn Handy odder watt et noch alles fürn Kram vandage giff. Wui spielen opp de Stroote und suseren düert ganze Durp. Muine scheune Kindheit möchte ick nitt missen.